

-korleis det gode så lett tek plassen til Den Gode

Under andre verdskrigen var kaffi sjeldan vare, og kaffi-erstatninga som var å få tak i var basert på løvetann og erter. Ingen som hadde smakt ekte kaffi føretrakk erstatninga. Likevel gjekk det ned, det var jo trass alt det nest beste, var det ikkje?

Vi les i Bibelen og syng rett som det er i songar at Gud skapte oss for at vi skulle vere nært knytt til han, og at det er det beste for oss. Men vi har så utruleg lett for å knyte våre håp, vår verdi og vår identitet til eitt eller anna som vi løftar opp og gjer til det viktigaste i livet vårt.

I denne serien vil vi prøve å avsløre korleis ting som egentleg er gode i seg sjølv kan bli guds-erstatningar. Kvifor ta til takke med det nest beste, erstatninga, når den ekte livgjevande varen er gratis tilgjengeleg for alle?

#### litt om tema

Tusenvis av kjærleikssongar og romantiske komediar og romanar fortel oss at det er ein som er den rette for oss, ein sjelevenn, og at når vi har funne han eller ho så kan vi endeleg vente oss at alt blir i orden, då har vi verdi og livet har mening.

Historia om Jakob, Rakel og Lea i 1. Mosebok er historia om ein som trudde på akkurat dette. Det er forteljinga om stormande forelsking, men også om avvising, om skuffelsar og nederlag.

For kva er egentleg erfaringa vår? Fungerer det å setje alle våre håp, alle våre draumar og all vår tillit til eit anna menneske, uansett kor god og fantastisk denne personen er? Kan eit anna menneske vere heile ditt liv?

Forelsking, romantikk, ekteskap og sex er fantastiske gåver. Og nettopp fordi dei er så gode har vi lett for å dyrke dei i staden for Han som gav alt dette til oss. Når vi frir oss frå å dyrke kjærleiken som avgud, så vil kjærleiken i staden peike oss mot den eine, sanne Gud.

# DRAUMEDAMA OG RIDDAR GALANT

Les teksta

1. Mos. 29, 15-35



Bibel

#### -vegleiande spørsmål:

Korleis blir Jakob lurt i denne teksta? Kva eller kven er det som lurer han?

Kva slags døme på avgudsdyrking kan du finne her? (Altså at nokon gjer noko anna enn Gud til det øvste, ultimate.)

- Korleis blir Lea behandla?



Fellesskap

#### -den ærlege samtalen

- Har du døme frå bøker, film, seriar eller liknande på nokon som ser ut til å dyrke romantikken på ein usunn måte?

Kva slags håp og forventingar er det best å leggje på Gud i staden for på ein annan person? Kva effekt kan det ha på ein partner å gjere det?

#### - gjennom deg og vidare



Misjon

At «Gud er kjærleik» er noko av det viktigaste vi kan formidle til andre. Men ofte blir det oppfatta som at «Kjærleiken er gud»? Er det ein skilnad og kva har det i så fall å seie?



Raushet

#### - takksam deling

Korleis kan akkurat din singeltilstand eller ditt parforhold gjere det mogleg å dele av det du har fått på måtar som du *ikkje* kunne gjort med ein annan sivilstand eller livsfase?

"Ingen naturlege kjensler er opphøgde eller låge, heilage eller ugudelege i seg sjølv. Dei er alle heilage når Guds hand har styringa. Dei vert alle forderva når dei riv seg laus og gjer seg sjølv til avgudar".

-C.S. Lewis,  
*Den store skilsmissa (1944)*



Bøn

#### - takk, bøn og forbøn

- Takk for romantikk, for forelsking, for heftige kjensler.
- Be om at både dei av dykk som er i eit parforhold og dei som ikkje er det må få hjelp til å setje ting i rett perspektiv, med Gud øvst og alt anna etter.
- Be om at Gud må bevare ekteskap og parforhold frå alle vonde angrep.
- Del bønneemne og be gjerne for kvarandre eller for andre personar.

Måten vi veks på som kristne er å lære oss å skilje ut kva som er Guds tale til oss og så handle på det. Av alle samtalanene, tekstane og bønene i dag: Kva har blitt ståande som viktigast? Under kan du skrive kva det er, og kva slags respons du vil gje dette. Du bestemmer sjølv om du vil dele dette med gruppa.

Kva hørde eg?

Kva gjer eg med det?



-korleis det gode så lett tek plassen til Den Gode